

Aalajangersagaq 2021

Aallarniut

NAKUUSA tassaavoq UNICEF-ip Namminersorlutik Oqartussallu suleqatigiissutaat. Suleqatigiinnermi siunertaavoq meeqqat Kalaallit Nunaanni najugallit kikkulluunniit peroriartornissaannut ineriartornissaannullu periarfissanik pitsaanerpaanik pilersitsinissaq, aammalu meeqqat namminneerlutik isummaminnik eqqarsaatersuutiminnillu saqqummiisarnissaminnut periarfissaqartinnissaat.

Ukiumoortumik Meeqqat Ataatsimeersuartarnerat erseqqissumik siunertaqarpoq, tassalu namminneerlutik oqaaseqarlutillu isummersortarnissaat oqallisigineqartussatut aalajangiussat iluanni. Oqaaserisaat aalajangersakkatut aaqqissuunneqartarput ingerlateqqinneqartarlutillu Naalakkersuisunut Borgmesterinullu. Taamaalillutik nunatsinni meeraqatitik inuusuttoqatitillu sinnerlugit isummersuutitik apuusaqartartuupput.

Meeqqat Ataatsimeersuarneri immikkoortoq 12-imi allassimasunut naapertuupput, tassanimi pineqarmat meeqqat pingaartitatik pillugit isummersorsinnaasut, aamma inersimasut pisussaaffeqartut meeqqat oqariartuutaannik pimoorussisarnissaminnut.

2011-imiilli meeqqat Kalaallit Nunaanni sumiiffinnit tamaneersut Meeqqat Ataatsimeersuarnerannut ukiut tamaasa peqataajartortarput. Kommunini tamani aamma illoqarfinni Tasiilami Qaanaamilu meeqqat isummersorfeqarput, aammattaaq atuarfiit nunatsinni 81-iusut 46-t Nakuusaaraqarput.

Meeqqat ataatsimeersuarnerat 2021 ingerlanneqarpoq Ilulissani ulluni 3. aamma 4. aprili 2022. Pinissaa kinguartinneqartariaqarsimavoq corona peqqutigalugu.

Meeqqat Ataatsimeersuarnerannut peqataapput meeqqat isummersorfiineersut 21-t kommuniniit Avannaata, Sermersooq aamma Qeqertalik kiisalu illoqarfik Qaanaaq. Silarlummik peqquteqarlutik Tasiilameersut Kommune Kujallermeersullu anngutinngitsoorput. Qaanaami meeqqat isummersorfianeersut ullormi kingullermi 3. aprilimi peqataapput. Anngutinngitsoortut qarasaasiakkut Teams aqutigalugu ataatsimeersuarqataanissaminnut periarfissaqarsimapput.

Ataatsimeersuarnissartik sioqqullugu ingerlanneqarneratalu nalaani meeqqat oqallisigisatut sammivaat silap pissusaata allanngoriartornera piujuaannartitsinerlu. Siunertaavoq meeqqat sammisatik pillugit immikkut ilisimasalinnik saqqummiivigineqarlutillu ilitersorneqarnermikkut pineqartut pillugit oqallinnissaat Meeqqallu Ataatsimeersuarnerannit siunnersuuteqarnissaat.

Siunnersuutaat ukununga pingasut sammitinneqarput:

- Politikerit aalajangiisartullu allat
- Nunaqqatit suliffeqarfiillu
- Meeqqat inuusuttullu

Sammissaq

Meeqqat Ataatsimeersuarneranni 2021-imi sammineqarput "silap pissusaata allanngoriartornera aamma piujuartitsineq". Silap pissusaata allanngoriartornerata tamatta eqqortarpaatigut, meeqqalli immikkut oqimaattorsiorititaasarput. Nunap sajuttarneri, qarsutsisarnerit anorersuarsuillu pineqarpata meeqqat ilungersunarnerpaamik eqqugaasarput, pisinnaatitaaffimminnik arsaagaasinnaagamik.

UNICEF-imi sulissutigaarput paasissutissiisarnikkut peqataatitsinikkullu meeqqat inersimasullu silap pissusaata allanngoriartornerinut sillimanerulernissaat avatangiisillu illersornissaannut qaammaasaqarnerulernissaat anguniarlugu. Qulakkeerniartarparput meeqqat inuusuttullu silap pissusaata oqallisigineqarneranut akullutillu tusaaniarneqarnerunissaat.

Silap pissusaa allanngoriartornera ajornartorsiutaavoq meeqqanik inuusuttunillu eqquisoq ernumataasorlu. Silammi pissusaata allanngornerata kingunerissavaa kinguaariit tullinnguuttut sunnigaanissaat. Taamaattumik pingaaruteqarpoq ullumikkorpiaq qanoq iliuuserisatta kingunerisinnaasaannik ilitersorlugillu paasinninnerulersinnissaat, tassuunakkut ernumananginnerusumik siunissaqarnissaq anguneqarsinnaammat.

Meeqqat inuusuttullu paasitinniarneqassapput qanoq iliuuseqarnikkut siunissaq allanngortinneqarsinnaammat. Meeqqat Ataatsimeersuarnermikkut periarfissaqalerput oqariatuutit taama ittut saqqummiuttarnissaannut.

Sammineqartup Meeqqat Pisinnaatitaaffii Pillugit Isumaqaatigiissutip immikkoortui pingasut attuumassuteqarfigai:

Meeqqat pillugit FN-imi isumaqaatigiissutip immikkoortua **12**: Meeqqat isumaasa ataqqineqarnissaat. Meeqqat pisinnaatitaaffeqarput pingaartititik pillugit qanorluunniit oqaaseqarsinnaanissaminnut. Inersimasut meeqqat isummersuutaannut tusarnaarlutillu pimoorussissapput.

Meeqqat pillugit FN-imi isumaqaatigiissutip immikkoortua **13**: Ilisimasat siammarternissaat. Meeqqat ilisimalikkaminnik, isummaminnik misigissutsiminnillu siammarterinissamut pisinnaatitaaffeqarput, oqaloqateqarnikkut, titartaanikkut, allannikkut imaluunniit allatut pinnguinnikkut, inunnut allanut ajoqusiinngitsumik.

Meeqqat pillugit FN-imi isumaqaatigiissutip immikkoortua **24**: Peqqinneq, lmeq, Nerisassat aamma Avatangiisit. Meeqqat pisinnaatitaaffeqarput pitsaanerpaamik paarineqarlutillu isumassorneqarnissaminnut, minguitsumik imernissaminnut, peqqinnartunik nerisaqarnissaminnut avatangiiseqarlutillu inuuffigissallugu isumannaatsumik.

Meeqqat Isummersorfii uku saqqummiukkusuppaat:

Asasavut politikerit aalajangiisartullu, nunaqqativut suliffeqarfiillu kiisalu meeraqativut inuusuttoqativullu.

Aalajangersakkatsinni aallaavigaavut Meeqqat pillugit isumaqatigiisummi immikkoortut 12, 13 aamma 24. Isumaqarpugut pingaartuusoq silap pissusaata allanngoriartornerani uagut meeqqat inuusuttullu siunissami avatangiisitsinnut kinguaassatsinnullu sunniuteqartussat pillugit tusarniarneqartarnissarput. Oqallinnermi tusarniarneqarlutalu akuutinneqarumavugut, taamaaliornikkut qulakkeerinneqataaffigerusukkatsigu qanoq iliuuseqartoqarnissaa. Aalajangersagaq taanna atorlugu tamassinnut oqarumavugut – KIKKULLUUNNIIT sunniuteqataasinnaapput!

Taamaattumik innersuutigut inuiaqatitsinni immikkoortunut pingasunut apuunniarpagut. Assigiinngitsunut innersuussutitsinnik apuussinitsigut neriuutigaarput kikkulluunniit sunniuteqarniartassasut qulakkeerumallugu kinguaariit tullinnguuttut minguitsunik isumannaatsunillu avatangiiseqarlutik inuusinnaanissaat.

Innersuussutit isumaqatigiissutigisavut aallaaveqarput qanoq iliorluta CO₂-mik aniatitsinerup apparsarneqarsinnaanerani, tassuunakkummi silap pissusaata allanngoriartornera kigaallisinneqarsinnaammat.

Aatsaat ataatsimut iliuuseqarnitsigut ulluinnarni atukkavut toqqissisimanarninngortissinnaavagut, meeqqanut inuusuttunullu tamanut avatangiisit minguitsut isumannaatsullu inuuffigineqarsinnaaqqullugit.

Taamaattumik innersuussutigaaavut:

Asasavut politikerit aalajangiisartullu, ilissinnut innersuussutigerusuppavut:

- Erngup nukinga atorlugu nukimmik piujuartumik pilersuineq annertusarsiuk.
- Seqernup anorillu nukingannik atorluaaneq inerisarsiuk.

Asasavut nunaqqativut suliffeqarfiillu, ilissinnut inneersuussutigerusuppavut:

- Najukkatsinni nerisassaativut pisiassaativullu pingaarnertitsigit – piujuartitsinermut iluaqutaassaaq CO₂-millu aniatitsinermut apparsaataassalluni.
- Atoqqiinissamat periarfissat ajornaannerulersissigit.

Asasavut meeraqatit inuusuttoqatillu, ilissinnut inneersuussutigerusuppavut:

- Atisanik atoqqiisaritsi, atisallu atorunnaakkasi pisariaqartitsisunut tunniuttarlugit.
- Streameraluni isiginnaartarneq annikillisarsiuk, ilissinnullu naapillusi peqatigiittarnisi amerlanerulersissigit.

NAKUUSA-mi Meeqqat Isummorsorfii sinnerlugit:

Ulloq sumiiffillu:

NAKUUSA Meeqqat Isummorsorfii

Tiguneqarpoq:

Ulloq sumiiffillu:

